

Գինեգործությունը շնչին չափով էր տարածված միայն Կապանում և նույնիսկ տեղական գինեգործությունը չէր բավարարում:

Պտղաբուծության շատ սահմանափակ զարգացումը Զանգեզուրում անբուսական էր և այն պատճառով, որ գավառի անտառներում բուսաբանները հայտնաբերել են պտղատու վայրի ծառերի մեծ բազմազանություն: Միայն վայրի տանձենիների մի քանի տասնյակ տեսակներ: Թվում էր թե դրանք պիտի հիմք ծառայեին տեղական տեսակների կուլտուրական մշակման համար: Առավել որ որոշ չափով պիտի ազդած լինեին այնպիսի բարձր պտղաբուծական շրջանի հարևանությունը, ինչպիսին է Մեղրին: Սակայն մինչև այսօր էլ ոչ միայն Միսիանի, ինչպես նաև Գորիսի շրջանները միրգը ստանում էին դրսից, գլխավորապես Նախիջևանի շրջանից Միսիանի (Բիշենաղի) լեռնանցքով, այլև կլիմայական պայմաններով պտղաբուծության զարգացման համար ավելի նպաստավոր պայմանների մեջ գտնվող Կապանը նույնպես չունեի իր շրջանի բավարարող մրգատու այգիներ և մրգեղենը ստանում էր Մեղրու շրջանից: Ճամփորդը Մեղրու շրջանից Ողջի (Օխչի) անցնելիս Տաշտունու (Դիբազուրի) լեռնանցքին պատահում էր ձիերի, ջորիների, էջերի քարավանների, որոնք տանում էին ծիրան, խաղող, դեղձ, տանձ և այլ պտուղներ, քոցնէրով բարձած, Կապանում վաճառելու համար:

Շիկահող գյուղում կար մի այնպիսի հետաքրքրական երևույթ, որը գաղափար էր տալիս թե ինչպես անտառը նախնական հասարակության մեջ կարող էր «այգու», «պարտեզի» վերածվել, այսինքն՝ գաղափար տալ այգեգործության ծագման մասին: Այստեղ անխախտ պահվող և հնուց սրբազարծված սովորություն էր, որ հենց անտառի մեջ պատվաստվում էր վայրի խնձորենին կամ տանձենին և այդ պատվաստված ծառը համարվում էր պատվաստողի սեփականություն, որին ուրիշն արդեն ձեռք չէր կարող տալ: Այս եղանակով նախնական դարերումն էլ անտառները կարող էին փոխվել պարտեզների, աչքի առաջ ունենալով և այն, որ անտառում ծառեր կտրելիս՝ առաջին հերթին ոչնչացվում էին անպտուղ ծառերը, իսկ մրգատուներից այնպիսիները, որոնց պտուղն անհամ էր լինում և ընդհակառակը, խնամք էր տարվում քաղցր մրգատու վայրի ծառերի մասին: Այստեղ կրկնվում էր այն պրոցեսը, որով վայրի հոտը դառնում էր ընտանի հոտ և նրա անասունի տեսակը ազնվացվում էր: Նախնական որսորդը՝ վայրի հոտի ետևից ընկած և այդ հոտն իր խմբի սեփականությունը համարելով՝ նախ սպանում էր նրա թույլ տեսակներին և ձագ չունեցողներին, մնացածին՝ ուժեղին և ձագ ունեցողներին, պաշտպանում էր գաղաններից և մարդկային այլ խմբերի հարձակումներից: Այսպիսով ազնվացվում էր այդ հոտը:

Շ Ե Ր Ա Մ Ա Պ Ա Հ Ո Ի Թ Յ Ո Ի Ն

Հունգը զարթեցնելու համար հնագույն ձևն էր սեփական մարմնի ջերմությամբ նրան տաքացնելը — փաթաթում էին կիթերը մի լաթի մեջ և պահում կրծքին շապիկի տակ և օրական մի քանի անգամ ստուգում՝ արդյոք չեն արթնացել: Ավելի նոր է թղթի կամ լաթի վրա հունգը փռելն ու օջախի մոտ կամ արևի տակ պահելը⁶⁸: Արթնացած շերամը փոխադրվում էր փրցմիճակ կամ

⁶⁸ СМОМПК, вып. XXV, отд. II, էջ 30—31 և Зелинский С. П., նշված աշխ., էջ 96: